

Date – 16/03/2026

Time - 7:30 -7:40 Hrs

AKASHVANI AIZAWL

REGIONAL NEWS BULLETIN

HEADLINES (MORNING)

1. Mizoram Universal Health Care Scheme thawh hnihna chu vawiinah Chief Minister Pu Lalduhoma'n a hawng dawn.
2. Revenue Minister Pu B. Lalchhanzova chuan Lengpui a Indian Air Force tana ram lakna tura ram inleina-ah ram lei leh hralhna Stamps & Registration Act hnuaiah Land Revenue & Settlement Department-ah ziah luh a la awm lo, a ti.
3. Vawiin Lok Sabha rorel inkhawmah Union Ministry of Railways leh Agriculture and Farmers Welfare te demand sawiho a ni ang.
4. West Asia-a indona chuan ni 16 na thleng tawhin inkahna a nasa zual sauh.

<><><>

ASSEMBLY SESSION

Mizoram Universal Health Care Scheme thawh hnihna chu vawiinah Chief Minister Pu Lalduhoma'n a hawng dawn.

Damloh nikhua a mahni insengso lova inenkawlna atana Mizoram sorkarin a kalpui mek Mizoram Universal Health Care Scheme kal mek chu March ni 31-ah a tawp dawn tak avangin MUHCS thawh hnihna 2.0 atan mipui nawlpui, general beneficiaries te tana inziahluhna hun chu February ni 16 atang khan hawn a ni a. MUHCS CEO Dr. Lalhriatzuali'n hemi chungchanga mipui hriat tur tul a sawina-ah tuna inziahluhna runpui hawn tur hi April ni 1,2026 atanga hman tan tur a ni dawn thu a tarlang a. Inziahluh hun hi April ni 15 thleng hawn a ni dawn tih a sawi bawk. Inziahluhna hi online-a kalpui hmasak tur a ni a, mahni awmhmun atangin inziahluh theih a ni dawn a, online a inziak lut duh tan <http://muhcs.mizoram.gov.in/> atangin inziahluh theih a ni dawn a ni.

MUHCS hnuaia hian Mipui mimir (General Beneficiary)-te inziahluh man hi duhthlan tur chi 3 siam a ni a, cheng 2,500 man, cheng 5,000 man leh cheng 10,000 man te a ni ang. Cheng 2,500 a inziaklutte hi an dam loh in general ward-ah admit an ni anga, cheng 5,000 pete chu semi cabin cheng singkhat pete chu cabin-ah an awm thei ang. Sorkar hnathawk, civil pensioner leh AB-PMJY Golden card hmang tu chhungkaw tan general beneficiary hnuaiah hian inziahluh hranpa a ngai ve dawn lo a ni. Inziahluh hun bituk hnulamah, inziahluh theih a nih thin tawh loh avangin mipuite'n ngai pawimawh a, hun bituk chhunga inziaklut theuh turin MUHCS CEO Dr. Lalhriatzuali chuan mitin a ngen a ni.

<><><>

## ASSEMBLY SESSION

Vawiin Assembly Budget session ni hnukung ber turah Chief Minister Pu Lalduhoma leh Pu F. Rodinglana te department enkawl sum hmanna tur ruahmanna sawi hova pawm tum a ni ang.

Vawiin chawhma dar 10 leh a chanve a assembly session tan a nih hunah darkar khat chhung chu zawhna leh chhanna hun atana hman a ni ang a. Chumi zawhah chuan Finance changtu Chief Minister Pu Lalduhoma'n Demand for Grants 2026 – 2027 pheik 529 leh 530 tihdikna House dawhkanah a dah ang a. Pu Lalmuanpuia Punte chuan “Mau mitvel” chungchangah House-ah thu a sawi ang. Hemi dawtah hian Pu F. Rodinglana chuan a department enkawl a sum ruahman - cheng vaibelchhe 1002, nuai 68, sing 4 leh sang 9 hmanna tur Power & Electricity leh cheng vaibelchhe 63, nuai 57, sing 8 leh sang 5 hmanna tur Commerce, Industries, Geology & Mining, a vaiin cheng vaibelchhe 1066, nuai 26, sing 3 leh sang 4 hmanna tur ruahmannate House pawmpui turin a thehltut ang a. Chief Minister Pu Lalduhoma pawhin cheng vaibelchhe 37, leh nuai 66 hmanna tur Legislative Assembly, cheng nuai 30 leh sing 8 hmanna tur Governor, cheng vaibelchhe 9, nuai 3 sing 4 leh sang 3 hmanna tur Council of Ministers, cheng vaibelchhe 81, nuai 67, sing 1 leh sang 1 hmanna tur Law & Judicial, cheng vaibelchhe 8, nuai 6 leh sang 7 hmanna tur Vigilance, cheng vaibelchhe 4,777, nuai 83, sing 2 leh sang 1 senna tur Finance, cheng vaibelchhe 131, nuai 21, leh sang 1 senna tur Secretariat Administration, cheng vaibelchhe 360, nuai 78, sing 1 leh sang 6 senna tur Planning & Programme Implementation leh cheng vaibelchhe 106, nuai 23, leh sang 1 senna tur General Administration, a vaiin cheng vaibelchhe 5,512, nuai 78 leh sang 8 senna turte chu House pawmpui turin a thehltut bawk ang a. Minister 2-te budget demand hi sawi hova pawm nghal tum a ni ang.

Minister 2-te department enkawlna atana budget a sum ruahman chungchang sawiho a, minister 2-in sawihona tlangkawma an khaikhawm hnu-a vote lak a nih hnu-ah Finance changtu Pu Lalduhoma chuan “The Mizoram Appropriation (Demand for Grants 2026-2027) Bill, 2026.” chu House pawmpui turin a pulut ang a. Hei hi pawm a nih chuan tangka kum thar (2026-2027) budget a sum ruahmante hi hman theih a ni tawh dawn a ni.

He mi hnu hian BAC-in budget session kal lai hi pawhsei a rawt a nih loh chuan Assembly inkhawm hi Speaker Pu Lalbiakzama'n tiam chin awm lovin a titawp (adjourned sine die) dawn a ni.

<><><>

## STAMP DUTY, REGISTRATION FEE

Land Revenue & Settlement Minister Pu B. Lalchhanzova chuan Lengpui a Indian Air Force tana ram lakna tura ram inleina-ah ram lei leh hralhna Stamps & Registration Act hnuaiyah Land Revenue & Settlement Department-ah ziah luh a la awm lo, a ti.

Assembly inkhawma MNF member Pu H. Lalzirliana zawhna chhangin Pu B. Lalchhanzova chuan cheng vaibelchhe 187 man ram hralhna Sale Deed siam tura Stamp Duty ngai zat chu, land value (ram hlutna) emaw, a ram hralhna man (sales amount), atanga sang zawk zawk atangin za zela 3 chawi tur a ni a. Ram hralhna man hi cheng vaibelchhe 187 a nih chuan stamp duty chhunluh tur chu cheng vaibelchhe 5 leh nuai 61 a ngaih thu a sawi a. Minister chuan Stamp duty hi a ram

hralhtu emaw a leitute'n inremna an siam angin an chawi tur a ni a ti. Registration fee pawh he ram inleina-ah hian chawi a awm lo niin a sawi a. Registration Act 1908, Section 17-in a sawi angin, property (land lease/sale deed) hi Compulsory Registrable tur a tih avangin Sub-Registrar's Office-ah register tir ngei tur a nih thu leh Registration tih a nih loh chuan Sorkar chuan document puitlingah a ngai lo tih a sawi a. Lengpui ram inleina-ah hian registration fee chu cheng singthum tur a nih thu sawiin tunah hian registration tih a la awm lo niin a sawi bawk.

<><><>

## **DISASTER**

Disaster Management & Rehabilitation Department Minister Prof. Lalnilawma chuan January 2025- January 2026 chhungin khuarel chhiatna avanga in leh lo chhia 581 a awmin, nunna chan mi 16 an awm thu tuna Mizoram Legislative Assembly neih mekah a sawi.

Khuarel chhiatna avanga in leh lo chhia te hi SDRF inkaihhraina-in a sawi angin in leh lo chhe vek, concrete in-ah cheng nuai khat 1 leh sing 2 pek a ni a, concrete ni lovah cheng nuai 1 leh sing 3 pek an ni. In leh lo chhe nual-ah cheng 6,500 emaw 4,000 pek an ni a, khuarel chhiatna avanga thute chhungkaw hnenah mi pakhat cheng nuai 4 zel pek an ni.

<><><>

## **UNREGULATED OIL EXPORT**

Asia khaw thlang lama indona avanga tuialhthei harsatna awm thei hlauhna a len viau lai-in Lawngtlai leh Siaha atangin Myanmar lamah petrol leh diesel thawn luh reng a la ni.

Mizoram Supply department chuan Ministry of Petroleum & Natural Gas thuchhuah sawi chhawng a, tun dinhmunah ram pumah eirawngbawlna gas leh tuialhthei hman tur India in chhekkhawl tha ni a sawi a nih lai-in indona thleng mek avanga harsatna an tawh loh nan mipuite chu eirawngbawlna gas leh tuialhthei renchem a tul tih an sawi a ni. Nilaini a Supply department-in thu an chhuah atang hian Petrol leh diesel lakna hmun a lun nghal a, thui tak taka lirthei intlar hmuh tur a awm a ni. He tiang a nih lai mek hian Lawngtlai atanga thu dawn chuan Zochachhuah leh Hruitezawl lamah tuialhthei hi Myanmar a phurh luh reng a nih thu an sawi a. Siaha district-ah pawh Lungpuk atanga thawn luh reng a ni a. He ta rawn lei bertute hi Chin state chhim lama awm Rakhine mite an nih thu an sawi bawk.

Lawngtlai district tlawmngai pawlte chuan Mizoramin tuialhthei harsatna namen lo a tawh theih reng lai a Myanmar lama tam tham tak tawlh luh reng a ni hi tihtawp an duh thu leh sorkarin hma la se an duh thu an sawi a ni. Chief Minister Pu Lalduhoma pawhin Nilaini khan Assembly inkhawmah ruahmanna fel awm lova chhim lam, a bikin Zochachhuah a insumdawn tawna lian tham kalpui a ni chu a vei thu a lo sawi tawh a ni.

<><><>

## **MBOCWWB**

Mizoram Building & Other Construction Workers Welfare Board (MBOCWWB) hnuaiah kum 2024-2025 chhungin hmang tangkatu mi 23,124 leh kum 2025-2026 chhungin hmang tangkaitu mi 31,036 beneficiary an awm.

MBOCWWB hnuaiah hian insak leh a kaihnawihawha thawkte Bana Kaih (Handholding) na tur ruahmanna engemawzat siam a ni a, heng ruahmanna zingah hian MBOCWWB member leh an chenpuite tana thiamthil hrang hrang 23 a skill development training kalpuina tur leh training zawha an bul tanna tur puih na'n duan a ni a, a thlawna inzirtirna bakah, entrance exam hmachhawn tur leh ram pawna hnathawk tura buatsaih te a tel a ni.

MBOCWWB hnuaia beneficiary te hian hamthatna hrang hrang an nei a, member hmeichhe tan nau neih lawmpuina-te, pension pangngai leh ramtuilei lo avanga pension, thihna chungchanga hamthatna, nupui/pasal neih chungchanga hamthatna, dam loh leh chetsual tawh palha hamthatna, member fate zirna lama tanpuina-te leh member te leh an fate tan Skill Development chi hrang hrang a tel a ni. MBOCWWB hnuaia membera inziaklut theite chu India khua leh tui dik tak kum 18-60 inkar, kumkhat chhunga ni 90 tal insak leh a kaihnawihawha a inhlawhfate an ni.



## **AIR NEWS ON SOCIAL MEDIA**

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.



## **LOK SABHA**

Vawiin Lok Sabha rorel inkhawmah Unin Ministry of Railways in kum 2026-27 chhunga an sum mamawh tur Demands for Grants sawiho-a pass tum a ni ang. Hei bakah hian Union Ministry of Agriculture and Farmers Welfare tan Demands for Grants 2026-27 te sawiho a ni bawk ang.

Hetihlai hian Rajya Sabha-ah chuan Appropriation Bill, 2026 sawiho a ni dawn a. He bill hi Consolidated Fund of India atanga kum 2025-26 sum indaihlohna dil belhna tur a ni.



## **ELECTION**

Election Commission-in State 4 – Assam, West Bengal, Tamil Nadu leh Kerala leh Union Territory 1 - Puducherry assembly inthlan neih dan tur, nimin khan a puang a, seat 294 awmna West Bengal-ah chuan inthlan hi thawh hnihah neih a ni ang a, April ni 23 leh ni 29-ah vote thlak a ni ang.

Seat 234 awmna, Tamil Nadu-ah April ni 23-ah vote thlak a ni ang a, member 126 awmna, Assam, Seat 140 awmna Kerala leh seat 30 awmna Puducherry-ah April ni 9 ah vote thlak a ni ang a, vote hi a rualin May ni 4-ah chhiar a ni ang.

Chief Election Commissioner, Gyanesh Kumar-a'n Delhi-a thuthar lakhawmtute a hrilh danin, assembly inthlan neihna tur state leh union territory-ah hian vote nei mi vbch 17 leh nuai 4 vel an awm a, Assam-ah vote nei mi vbch 2 leh nuai 50 awmin Kerala-ah vbch 2 leh nuai 70 an awm a ni.

(CEC byte)

CEC Pu Kumar-a chuan Puducherry-ah vote nei mi nuai 9 sing 4 sang 4, Tamil Nadu-ah vbch 5 leh nuai 67, West Bengal-ah vote nei mi vbch 6 leh nuai 44 an awm thu pawh sawiin Assembly inthlan neih hun tur puan anih rual hian model code of conduct kenkawh nghal a ni, a ti bawk.

<><><>

## WESY ASIA

West Asia-a indona chuan ni 16 na thleng tawhin inkahna a nasa zual sauh a. Nimin khan US leh Israel te chuan ahma aia na zawkin Iran an kap leh a. Iran-a Industry tamna khapwui Isfahan chu vawi tam tak kah a ni a, missile 15 chuang kah niin heng zinga pakhat hian factory a fuh a. He factory a thawk mi 15 an thi nia thudawn a ni. Islamic Revolutionary Gaurd Corps te chuan chhangletin Israel hmun engemawzat an kap a ni.

US President Donald Trump-a chuan Tehran nena inremna siam thei dinhmunah an ding lo tih a sawi a. President Trumpa chuan Iran in tuialhthei a thawnchhuahna pui ber Kharg Island chu kahah a vau zui nghal a ni.

<><><>